

水經注

卷之

水經注卷十四

後魏酈道元撰

濕餘水 沽河 鮑丘水 濡水

大遼水 小遼水 淇水

濕餘水出上谷居庸關東案漢書地理志上谷郡軍都

秦定三年温榆水溢昌平山水記云温榆河即昌平之

榆河遼史作温渝本水經注之濕餘水以字相似而訛

也今考温與濕並灑之訛後漢書王霸傳云可從温水

漕温水乃灑水唐韋挺運米至盧思臺方知渠閉則久

壞不脩耳霸所漕者温水非温餘水也李賢注引温餘

釋之疎矣灑水有說文爲顯證而温餘見漢書濕餘見

水經注

卷十四

一

關在沮陽城東南六十里居庸界故關名矣更始使
者入上谷案近刻脫更始二字耿況迎之于居庸關卽是關也

其水導源關山南流歷故關下溪之東岸有石室三

層其戶牖扇扉悉石也蓋故關之候臺矣南則絕谷

累石爲關垣案近刻訛作址崇墉峻壁非輕功可舉山岫層

深側道褊狹林鄣邃險案遂近刻訛作據路才容軌曉禽暮

獸寒鳴相和羈官遊子聆之者莫不傷思矣其水歷

山南逕軍都縣界又謂之軍都關續漢書曰尙書盧

植隱上谷軍都山是也案近刻脫是字其水南流出關謂之

下口水流潛伏十許里也案近刻也上行是字

東流過軍都縣南案東流上近刻衍又字又東流過薊縣北

濕餘水故瀆東逕軍都縣故城南又東重源潛發積

而爲潭謂之濕餘潭又東流易荆水注之其水導源

西北千蓼泉案近刻北下行逕字亦曰丁蓼水東南流逕郁山

西謂之易荆水公孫瓚之敗于鮑丘也走保易荆疑

阻此水也案瓚走保易京在今雄縣界非易荆水也此誤引易荆水又東左

合虎眼泉水出平川東南流入易荆水又東南與孤

山之水合水發川左導源孤山東南流入易荆水謂

之塔界水又東逕薊城又東逕昌平縣故城南案昌平近

刻訛作又謂之昌平水魏土地記曰薊城東北百四

十里有昌平城城西有昌平河又東流注濕餘水案

近刻訛濕餘水又東南流左合芹城水案合近刻

出北山南逕芹城案此下近東南流注濕餘水濕餘

水又東南流逕安樂故城西更始使謁者韓鴻北徇

承制拜吳漢為安樂令即此城也

又北屈東南至狐奴縣西入于沽河

昔彭寵使狐奴令王梁南助光武起兵自是縣矣濕

餘水于縣西南東入沽河故地理志曰濕餘水自軍

都縣東至潞南入沽是也案潞今漢書作路

沽河從塞外來

沽河出禦夷鎮西北九十里丹花嶺下東南流大谷

水注之水發鎮北大谷溪西南流逕獨石北界石孤

生不因阿而自峙案阿近刻又南九源水注之案源

訛作水導北川左右翼注八川共成一水案八近刻

故有九源之稱其水南流至獨石注大谷水大谷水

又南逕獨石西又南逕禦夷鎮城西魏太和中置以

捍北狄也又東南尖谷水注之水源出鎮城東北尖

溪西南流逕鎮城東西南流注大谷水亂流南注沽

水又南出峽夾岸有二城案近刻脫夾字世謂之獨固門以

其藉險憑固易為依据案据據古字通巖壁升聳案巖近刻訛作兼

疎通若門故得是名也沽水又南左合乾溪水引北

川西南逕一故亭東又西南注沽水又西南逕

赤城東趙建武年并州刺史王霸為燕所敗退保此

城城在山阜之上下枕深隍案枕近刻訛作抗溪水之名藉

以變稱故河有赤城之號矣沽水又東南與鵲谷水

合水有二源南即陽樂水也案濡水注內又別有陽樂水此水漢志作樂陽

水出且居縣地理志曰水出縣東南流逕大翻山小

翻山北案東南流近刻作東北流歷女祁縣故城南地理志曰東

部都尉治王莽之祁縣也世謂之橫水又謂之陽田

河案田近刻訛作曲又東南逕一故亭又東左與候鹵水合

案候近刻訛作舊下同水出西北山東南流逕候鹵城北城在

居庸縣西北二百里故名云候鹵太和中更名禦夷

鎮又東南流注陽樂水陽樂水又東南傍狼山南案傍

字上近刻山石白色特上案近刻脫白字亭亭孤立超出羣

山之表又東南逕溫泉東泉在山曲之中又逕赤城西屈逕其城南東南入赤城河河水又東南右合高峯水水出高峯戍東南城在山上其水西南流又屈而東南入沽水沽水又西南流出山逕漁陽縣故城西而南合七度水水出北山黃頌谷故亦謂之黃頌水東南流注于沽水沽水又南漁水注之水出縣東南平地泉流西逕漁陽縣故城南應劭曰在漁水之

陽也

案近刻脫此九字

考諸地說則無聞

案此下近刻衍所識釋三字

脈

水尋川則有自

案近刻訛作考地尋川則有應氏自

今城在斯水之陽

有符應說漁陽之名當屬此秦發閭左戍漁陽卽是

城也漁水又西南入沽水

案漁水近刻訛作漁陽

沽水又南與

螺山之水合水出漁陽城南小山魏土地記曰城南五里有螺山其水西南入沽水沽水又南逕安樂縣故城東晉書地道記曰晉封劉禪爲公國俗謂之西潞水也

南過漁陽狐奴縣北西南與濕餘水合爲潞河

案潞近刻訛作

沽水西南流逕狐奴山西又南逕狐奴縣故城西漁

陽太守張堪于縣開稻田教民種殖百姓得以殷富
童謠歌曰桑無附枝麥秀兩岐張君為政樂不可支

視事八年匈奴不敢犯塞沽水又南陽重溝水注之

水出狐奴山南轉逕狐奴城西案近刻訛作南王莽之所謂

舉符也側城南注右會沽水沽水又南濕餘水注之

沽水又南左會鮑丘水世所謂東潞也沽水又南逕

潞縣為潞河案近刻訛作為潞名潞河也魏土地記曰城西三十

里有潞河是也案近刻脫是字

又東南至雍奴縣西為笥溝案近刻脫為字

灑水入焉俗謂之合口也又東鮑丘水于縣西北而

東出案近刻出下有焉字衍

也又東南至泉州縣與清河合東入于海清河者派河尾

也沽河又東南逕泉州縣故城東王莽之泉調也沽水

又東南合清河今無水清淇漳洹澶易涿濡沽滹沱

同歸于海案淇近刻訛作湛故經曰派河尾也

鮑丘水從塞外來南過漁陽縣東

鮑丘水出禦夷北塞中南流逕九莊嶺東俗謂之大

榆河又南逕鎮東南九十里西密雲戍西又南左合

道人溪水水出北川案近刻脫出字南流逕孔山西又歷密

雲戍東左合孟廣峒水水出峒下峒甚層峻峨峨冠

衆山之表其水西逕孔山南上有洞穴開明故土俗

以孔山流稱峒水又西南至密雲戍東西注道人水

亂流西南逕密雲戍城南案近刻脫西南二字右會大榆河有

東密雲故是城言西矣大榆河又東南流白楊泉水

注之北發白楊溪望離右注大榆河案望離與下自坎相對舉近刻

訛作又東南龍芻溪水自坎注之案坎近刻訛作決大榆河

望離

又東南出峽案近刻脫出字逕安州舊漁陽郡之滑鹽縣南

左合縣之北溪水水出縣北廣長塹南太和中掘此

以防北狄其水南流逕滑鹽縣故城東王莽更名匡

德也漢明帝改曰鹽田右承治世謂之斛鹽城西北

去禦夷鎮二百里南注鮑丘水又南逕僂奚縣故城

東案奚近刻訛作溪王莽更之曰敦德也鮑丘水又西南逕

獷平縣故城東王莽之所謂平獷也又南合三城水

水出曰里山案日近刻作四西逕三城案近刻作平獷城蓋後人所改謂之

三城水又逕香陘山山上悉生橐本香世故名焉又

西逕石窟南窟內寬廣行者依焉窟內有水淵而不
流栖薄者取給焉又西北逕伏凌山山南案凌近刻訛作凌與

石門水合水出伏凌山山高峻巖鄣寒深陰崖積雪

凝冰夏結事同離騷峨峨之詠故世人因以名山也

一水西南流注之案近刻脫一字是水有桑谷之名蓋沿出

桑溪故也又西南逕獮平城東南而右注鮑丘水鮑

丘水又東南逕漁陽縣故城南漁陽郡治也案近刻脫縣故

城南漁陽六字秦始皇二十二年置王莽更名通潞縣曰得

漁鮑丘水又西南流公孫瓚既害劉虞烏丸思劉氏

之德迎其子和合衆十萬破瓚于是水之上斬首一

萬鮑丘水又西南歷狐奴城東又西南流注于沽河

亂流而南

又南過潞縣西

鮑丘水入潞通得潞河之稱矣案潞河近刻訛作鮑丘高粱水

注之水首受灤水于戾陵堰水北有梁山山有燕刺

王旦之陵故以戾陵名堰水自堰枝分東逕梁山南

又東北逕劉靖碑北其詞云魏使持節都督河北道

諸軍事征北將軍建城鄉侯沛國劉靖字文恭登梁

山以觀源流相灑水以度形勢案灑近刻訛作隰脫水字嘉武安

之通渠羨秦民之殷富案羨近刻訛作美乃使帳下丁鴻督

軍士千人案督字近刻訛在丁鴻上以嘉平二年立遏于水案遏即竭

導高梁河造戾陵遏開車箱渠其遏表云高梁河水

者出自并州潞河之別源也案近刻潞訛作黃也訛作時長岸峻

固直截中流積石籠以為主遏高一丈東西長三十

丈南北廣七十餘步依北岸立水門門廣四丈立水

十丈山水暴發案近刻訛作山川暴戾則乘遏東下平流守常

則自門北入灌田歲二千頃凡所封地百餘萬畝至

景元三年辛酉詔書以民食轉廣陸廢不贍遣謁者

樊晨更制水門限田千頃刻地四千三百一十六頃

出給郡縣改定田五千九百三十頃水流乘車箱渠

自薊西北逕昌平平東盡漁陽潞縣凡所潤含案近刻作舍

四五百里所灌田萬有餘頃高下孔齊案近刻訛作濟原隰

底平疏之斯溉決之斯散導渠口以為壽門灑澎池

以為甘澤施加于當時敷被于後世晉元康四年君

少子驍騎將軍平鄉侯弘受命使持節監幽州諸軍

事領護烏丸校尉寧朔將軍遏立積三十六載至五

年夏六月洪水暴出毀損四分之三剩北岸七十餘丈上渠車箱所在漫溢追惟前立遏之勲親臨山川指授規略命司馬關內侯逢惲內外將士二千人起長岸立石渠脩主遏案主近刻訛作立治水門門廣四丈立水五尺興復載利通塞之宜準遵舊制凡用功四萬有餘焉諸部王侯不召而自至繼負而事者蓋數千人詩載經始勿亟易稱民忘其勞斯之謂乎于是二府文武之士感秦國思鄭渠之績魏人置豹祀之義乃遐慕仁政追述成功元康五年十月十一日刊石

立表以紀勲烈并記遏制度永為後式焉事見其碑

辭又東南流逕薊縣北案近刻脫逕字又東至潞縣注于鮑

丘水又南逕潞縣故城西王莽之通路亭也漢光武

遣吳漢耿弇等破銅馬五幡于潞東謂是縣也屈而

東南流逕潞城南世祖拜彭寵為漁陽太守治此寵

叛光武遣游擊將軍鄧隆伐之軍于是水之南光武

策其必敗果為寵所破遺壁故壘存焉鮑丘水又東

南入夏澤澤南紆曲渚十餘里北佩謙澤眇望無垠

也案垠近刻訛作限

又南至雍奴縣北屈東入于海

鮑丘水自雍奴縣故城西北舊分筍溝水東出今筍

溝水斷

案今近刻訛作合脫水字

衆川東注混同一瀆東逕其縣

北又東與洵河合水出右北平無終縣西山白楊谷

西北流逕平谷縣屈西南流獨樂水入焉水出北抱

犢固南逕平谷縣故城東後漢建武元年光武遣十

二將追大槍五幡及平谷大破之于是縣也其水南

流入于洵洵水又左合盤山水水出山上其山峻險

人跡罕交去山三十許里望山上水可高二十餘里

素湍皓然頽波歷溪沿流而下自西北轉注于洵水

洵水又東南逕平谷縣故城東南與洳河會水出北

山山在僊奚縣故城東南東南流逕博陸故城北又

屈逕其城東世謂之平陸城非也漢武帝璽書封大

司馬霍光為侯國文穎曰博大陸平取其嘉名而無

其縣食邑北海河東薛瓚曰按漁陽有博陸城謂此

也今城在且居山之陽

案近刻訛作今其居山之陽

處平陸之上

市帶川流面據四水文氏所謂無縣目

案近刻訛作有嘉美

名也洳水又東南流逕平谷縣故城西而東南流注

于洵河

案洵河上近刻衍渠字

洵河又南逕鞅城東而南合五

百溝水水出七山北東逕平谷縣之鞅城南東入于

洵河洵河又東南逕臨洵城北

案洵近刻訛作河

屈而歷其

城東側城南出竹書紀年梁惠成王十六年齊師及

燕戰于洵水齊師遁卽是水也洵水又南入鮑丘水

鮑丘水又東合泉州渠口故瀆上承滹沱水于泉州

縣

案滹沱原本及近刻並訛作宰池考淇水注云滹河至泉州縣北入滹沱又東泉州渠出焉卽此今

正故以泉州爲名北逕泉州縣東又北逕雍奴縣東

西去雍奴故城百二十里自滹沱北入其下歷水澤

百八十里入鮑丘河謂之泉州口陳壽魏志曰曹太

祖以蹋頓擾邊將征之

案將字上近刻衍公字

從洵口鑿渠逕

雍奴泉州以通河海者也今無水鮑丘水又東庚水

注之

案庚原本及近刻並訛作庚下同考漢志右北平無終漚水西至雍奴入海俊靡灑水南至無

終東入庚顏師古云漚音庚卽下所云入水出右北

平徐無縣北塞中而南流歷徐無山得黑牛谷水又

得沙谷水竝西出山東流注庚水昔田子泰避難居

之

案子泰近刻訛作于泰

衆至五千家開山圖曰山出不灰之

木生火之石按注云其木色黑似炭而無葉有石赤

色如丹以二石相磨

案二近刻訛作一

則火發以然無灰之

木可以終身今則無之其水又逕徐無縣故城東王

莽之北順亭也魏土地記曰右北平城東北百一十

里有徐無城其水又西南與周盧溪水合水出徐無

山東南流注庚水庚水又西南流灑水注之水出右

北平俊靡縣王莽之俊麻也東南流

案近刻脫此三字

世謂

之車輦水又東南流與溫泉水合水出北山溫溪

案近

刻脫溫字

即溫源也養疾者不能澡其炎漂以其過灼故

也

案近刻脫也字

魏土地記曰徐無城東有溫湯即此也其

水南流百步便伏流入于地下水盛則通注灑水又

東南逕石門峽山高嶄絕

案山下近刻衍之字

壁立洞開俗謂

之石門口漢中平四年漁陽張純反殺右北平太守

劉政遼東太守陽紘中平五年詔中郎將孟益

案近刻詔

訛作與益訛作溢

率公孫瓚討純戰于石門大破之灑水又

東南流謂之北黃水又屈而為南黃水又西南逕無

終山即帛仲理所合神丹處也又于是山作金五千

斤以救百姓山有陽翁伯玉田在縣西北有陽公壇

社即陽公之故居也搜神記曰雍伯洛陽人至性篤

孝父母終歿葬之于無終山山高八十里而上無水
 雍伯置飲焉有人就飲與石一斗令種之玉生其田
 北平徐氏有女雍伯求之要以白璧一雙媒者致命
 伯至玉田求得五雙徐氏妻之遂即家焉陽氏譜敘
 言翁伯是周景王之孫食采陽樊春秋之末爰宅無
 終因陽樊而易氏焉愛人博施天祚玉田其碑文云
 居于縣北六十里翁同之山後踈徙于西山之下陽
 公又遷居焉而受玉田之賜情不好寶玉田自去今
 猶謂之為玉田陽干寶曰于種石處四角作大石柱

各一丈中央一頃之地名曰玉田至今相傳云玉田
 之揭起于此矣而今不知所在同于譜敘自去文矣

案于近刻訛作之又玉田自去見碑
 文此言譜敘者或碑文即譜敘所引藍水注之水出

北山東流屈而南案近刻作東
 屈而南流逕無終縣故城東故

城無終子國也春秋襄公四年案近刻訛
 作十四年無終子嘉

父使孟樂如晉因魏絳納虎豹之皮請和諸戎是也

故燕地矣秦始皇二十二年滅燕置右北平郡治此

王莽之所謂北順也漢世李廣為郡出遇伏石謂虎

也射之飲羽即此處矣魏土地記曰右北平城西北

百三十里有無終城其水又南入灑水灑水又西南入于庚水地理志曰灑水出俊靡縣南至無終東入

庚水庚水世亦謂之為柘水也南逕燕山下案近刻訛作上

懸巖之側有石鼓去地百餘丈望若數百石因有石

梁貫之鼓之東南有石援桴狀同擊勢耆舊言燕山

石鼓鳴則土有兵庚水又南逕北平城西而南入鮑

丘水謂之柘口鮑丘水又東逕右北平郡故城南魏

土地記曰薊城東北三百里有右北平城鮑丘水又

東巨梁水注之水出土垠縣北陳宮山西南流逕觀

雞山謂之觀雞水水東有觀雞寺寺內起大堂案起近刻

訛作甚高廣可容千僧下悉結石為之上加塗墍基

內疎通枝經脈散基側室外四出爨火炎勢內流一

堂盡温蓋以此土寒嚴霜氣肅猛出家沙門率皆貧

薄施主慮闕道業故崇斯構是以志道者多栖託焉

其水又西南流右合區落水水出縣北山東南流入

巨梁水巨梁水又南案近刻訛作西逕土垠縣故城西左會

寒渡水水出縣東北西南流至縣右注梁河梁河又

南澗于水注之水出東北山西南流逕土垠縣故城

東西南流入巨梁水巨梁水又東南右合五里水水發北平城東北五里山故世以五里名溝一名田繼泉西流南屈逕北平城東東南流注巨梁河亂流入于鮑丘水案此下近刻有巨梁二字衍自是水之南南極滹沱案近刻脫一南字西至泉州雍奴東極于海謂之雍奴藪其澤野有九十九淀枝流條分案近刻訛作技流條右往往逕通非惟梁河鮑丘歸海者也

濡水從塞外來東南過遼西令支縣北

濡水出禦夷鎮東南其水二源雙引夾山西北流出

山合成一川

案濡水即今灤河源出巴延屯圖古爾山名都爾本諾爾西北至茂罕和碩三道河始自東會之道元當時未經親履其地遂以夾山來會之三道河為灤河正源殊屬失實恭讀御製灤源考證訂覈審確實足正臆氏之誤謹錄弁卷首並附識于此又西北逕禦夷故

城東鎮北百四十里北流左則連淵水注之

案左下近刻衍

道字淵訛作泉

水出故城東西北流逕故城南又西北逕綠

水池南池水淵而不流

案池近刻訛作其

其水又西屈而北

流又東逕故城北連結兩沼

案沼上近刻衍池字

謂之連淵浦

案淵近刻訛作泉

又東北注難河難河右則汗水入焉

案汗近刻

汗水出東塢南西北流逕沙野南北人名之曰沙野

案近刻脫野字鎮東北二百三十里西北入難河濡難聲相

近狄俗語訛耳濡水又北逕沙野西又北逕箕安山

東屈而東北流逕沙野北東北流逕林山北案後有木林山

水其地卽唐之松陁疑林山及木林山皆松林山之訛水北有池潭而不流濡

水又東北流逕孤山南東北流呂泉水注之水出呂

泉塢西東南流屈而東逕塢南東北流三泉水注之

其源三泉雁次合爲一水鎮東北四百里東南注呂

泉水呂泉水又東逕孤山北又東北逆流水注之水

出東南導泉西流右屈而東北注木林山水會之水

出山南東注逆水亂流東北注濡河濡河又東盤泉

入焉水自西北東南流注濡河濡河又東南水流迴

曲謂之曲河鎮東北三百里又東出峽入安州界東

南流逕漁陽白檀縣故城地理志曰濡水出縣北蠻

中案漢志白檀縣作洹水師古曰洹音呼焉反漢景帝詔李廣曰將軍其

帥師東轅弭節白檀者也又東南流右與要水合水

出塞外三川竝導謂之大要水也東南流逕要陽縣

故城東本都尉治王莽更之曰要術矣要水又東南

流逕白檀縣而東南流入于濡案白檀要陽在今密雲縣竝非灤水所經

酈氏此條舛誤殊甚御製熱河考灤源考證特加辨正一破千古傳訛謹附

訂于濡水又東南索頭水注之水北出索頭川南流

案此八字近刻訛作水北流南四字逕廣陽僑郡西魏分右北平置今

安州治又南流注于濡濡水又東南流武列水入焉

其水三川派合西源右為溪水亦曰西藏水東南流

出溪與蟠泉水合泉發州東十五里東流九十里東

注西藏水西藏水又西南流東藏水注之水出東溪

一曰東藏水西南流出谷與中藏水合水導申溪南

流出谷南注東藏水故目其川曰三藏川水曰三藏

水東藏水又南右入西藏水

案西藏水即今之固都爾呼河先合中藏水即

今之茅溝河次合東藏水即今之賽音河酈氏敘東藏水于中藏水之前以為東溪西溪合流而與西源

會殊乖川流之次恭讀御製熱河考訂正詳審道元之附會耳食顯然無疑謹

錄弁卷首並附識于此亂流右會龍泉水水出東山下淵深不

測其水西南流注于三藏水三藏水又東南流與龍

芻水合西出于龍芻之溪

案西近刻訛作而

東流入三藏水

案近刻脫三字

又東南流逕武列溪

案近刻脫武字

謂之武列水東

南歷石挺下挺在層巒之上

案近刻脫挺字在訛作左又此句之下衍有字

孤石雲舉臨崖危峻可高百餘仞牧守所經

案近刻作逕

命選練之士彎張弧矢

案近刻脫張字

無能屈其崇標者其

水東合流入濡濡水又東南五渡水注之水北出安

樂縣丁原山南流逕其縣故城西本三會城也其水

南入五渡塘于其川也流紆曲溯涉者頻濟故川塘

取名矣又南流注于濡濡水又與高石水合水東出

安樂縣東山西流歷三會城南西入五渡川下注濡

水濡水又東南逕盧龍塞塞道自無終縣東出渡濡

水向林蘭陁東至清陁

案清陁方輿紀要作青陁下同

盧龍之險峻

坂縈折故有九紵之名矣

案紵近刻作呼

燕景昭元璽二年

遣將軍步渾治盧龍塞道焚山刊石令通方軌刻石

嶺上以記事功其銘尚存而庾杲之注揚都賦言盧

龍山在平岡城北殊為孟浪遠失事實余按盧龍東

越清陁至凡城二百許里自凡城東北出趣平岡故

城可百八十里向黃龍則五百里故陳壽魏志田疇

引軍出盧龍塞塹山堙谷五百餘里逕白檀歷平岡

登白狼望柳城平岡在盧龍東北遠矣而仲初言在

南非也濡水又東南逕盧龍故城東漢建安十二年

魏武征蹋頓所築也濡水又南黃洛水注之水北出

盧龍山南流入于濡濡水又東南洛水合焉水出盧龍塞西南流注濡水濡水又屈而流

案近刻訛作左又合屈而注

得去潤水又合敖水二水竝自盧龍西注濡水濡水

又東南流逕令支縣故城東王莽之令氏亭也秦始

皇二十二年分燕置遼西郡令支隸焉魏土地記曰

肥如城西十里有濡水南流逕孤竹城西右合立水

世謂之小濡水

案世近刻訛作也

非也水出肥如縣東北立

溪

案近刻脫縣字

西南流逕其縣東東屈南轉西迴逕肥如

縣故城南俗又謂之肥如水

案近刻脫之字又此句之下衍非也二字故

城肥子國應劭曰晉滅肥肥子奔燕燕封于此故曰

肥如也漢高帝六年封蔡寅為侯國西南流右會盧

水水出縣東北沮溪南流謂之大沮水又南左合陽

樂水水出東北陽樂縣溪

案近刻脫溪字

地理風俗記曰陽

樂故燕地

案近刻訛作也

遼西郡治秦始皇二十二年置魏

土地記曰海陽城西南有陽樂城其水又西南入于

沮水謂之陽口沮水又西南小沮水注之水發冷溪

世謂之冷池又南得溫泉水口

案此下近刻衍注之二字

水出東

北溫溪自溪西南流入于小沮水小沮水又南流與

大沮水合而為盧水也桑欽說盧子之書言晉既滅肥遷其族于盧水盧水有二渠號小沮大沮合而入

于立水案水上近刻衍盧字又南與溫水合水出肥如城北西

流注于立水地理志曰盧水南入立立水又西南逕

孤竹城北西入濡水故地理志曰立水東入濡蓋自

東而注也地理志曰令支有孤竹城故孤竹國也案

字近刻訛史記曰孤竹君之二子伯夷叔齊讓國于

此而餓死于首陽漢靈帝時遼西太守廉翻夢人謂

已曰余孤竹君之子伯夷之弟遼海漂吾棺槨聞君

仁善願見藏覆明日視之水上有浮棺吏嗤笑者皆無疾而死于改葬之晉書地道志曰遼西人見遼水有浮棺欲破之語曰我孤竹君也汝破我何為因為立祠焉祠在山上城在山側肥如縣南十二里水之會也

又東南過海陽縣西南入于海

濡水自孤竹城東南逕西鄉北案西近刻訛作主瓠溝水注

之水出城東南東流注濡水濡水又逕故城南案故

訛作分爲二水北水北水枝出世謂之小濡水也東逕樂

安亭北東南入海濰水東南流逕樂安亭南東與新河故瀆合瀆自雍奴縣承鮑丘水東出謂之鹽關口

魏太祖征蹋頓與洶口俱導也世謂之新河矣案近刻脫

之陳壽魏志云以通海也案近刻脫云字又新河又字

東北絕庚水案近刻訛又東北出逕右北平絕洶渠

之水又東北逕昌城縣故城北案此下近刻衍故字王莽之淑

武也新河又東分爲二水案近刻脫分字枝瀆東南入海新

河自枝渠東出合封大水謂之交流口案近刻訛作合水出

新安平縣案近刻脫西南流逕新安平縣故城西地

理志遼西之屬縣也又東南流龍鮮水注之水出縣

西北世謂之馬頭水案近刻訛作山二源俱導南合一川東

流注封大水案近刻脫封字地理志曰龍鮮水東入封大水

者也亂流南會新河南注于海案注近刻訛作流地理志曰

封大水于海陽縣南入海新河又東出海陽縣與緩

虛水會案虛近刻訛水出新平縣東北世謂之大籠

川案近刻訛作山東南流逕令支城西西南流與新河合南

流注于海案近刻脫注字地理志曰緩虛水與封大水皆南

入海新河又東與素河會謂之白水口水出令支縣

之藍山南合新河又東南入海新河又東至九過口

案過近刻作過枝分南注海新河又東逕海陽縣故城南漢

高祖六年封搖母餘為侯國魏土地記曰合支城南

六十里有海陽城者也新河又東與清水會水出海

陽縣東南流逕海陽城東又南合新河又南流十許

里西入九過注海新河東絕清水又東木究水出焉

南入海新河又東左迤為北陽孤淀案北近刻訛作孔淀水

右絕新河案近刻脫淀水二字右上行名字南注海新河又東會于

濡濡水又東南至絜縣碣石山文穎曰碣石在遼西

絜縣王莽之選武也絜縣并屬臨渝王莽更臨渝為

馮德案馮近刻訛作憑地理志曰大碣石山在右北平驪成

縣西南王莽改曰揭石也案揭近刻作碣漢武帝亦嘗登之

以望巨海而勒其石于此今枕海有石如甬道數十

里當山頂有大石如柱形往往而見立于巨海之中

潮水大至則隱案近刻脫此二字及潮波退不動不沒不知

深淺世名之天橋柱也狀若人造要亦非人力所就

韋昭亦指此以為碣石也三齊略記曰始皇于海中

作石橋海神為之豎柱始皇求與相見神曰我形醜

莫圖我形當與帝相見乃入海四十里見海神左右
 莫動手工入潛以腳畫其狀神怒曰帝負約速去始
 皇轉馬還前腳猶立後腳隨崩僅得登岸畫者溺死
 于海衆山之石皆傾注今猶岌岌東趣疑卽是也濡
 水于此南入海而不逕海陽縣西也蓋經誤證耳又
 按管子齊桓公二十年征孤竹未至卑耳之溪十里
 闕然止矐然視援弓將射案接近刻訛作授引而未發謂左
 右曰見前乎左右對曰不見公曰寡人見長尺而人
 物具焉冠右祛衣走馬前豈有人若此乎管仲對曰

臣聞豈山之神有偷兒

案管子作豈山之神有偷兒

長尺人物具

霸王之君興則豈山之神見且走馬前走導也祛衣
 示前有水右祛衣示從右方涉也至卑耳之溪有贊
 水者從左方涉其深及冠右方涉其深至膝已涉大
 濟桓公拜曰仲父之聖至此寡人之抵罪也久矣今
 自孤竹南出則巨海矣而滄海之中山望多矣然卑
 耳之川若贊溪者亦不知所在也昔在漢世海水波
 襄吞食地廣當同碣石苞淪洪波也

大遼水出塞外衛白平山東南入塞過遼東襄平縣西

遼水亦言出砥石山案砥近刻自塞外東流直遼東

之望平縣西王莽之長說也屈而西南流逕襄平縣

故城西秦始皇二十二年滅燕置遼東郡治此漢高

帝八年封紀通為侯國王莽之昌平也故平州治又

南逕遼隊縣故城西案近刻南訛作王莽更名之曰

順睦也案睦近刻公孫淵遣將軍畢衍拒司馬懿于

遼隊即是處也案此下近刻有遼水又南歷縣

又東南過房縣西

地理志房故遼東之屬縣也遼水右會白狼水水出

右北平白狼縣東南案近刻此下有廣北流西北屈

逕廣成縣故城南王莽之平虜也俗謂之廣都城又

西北石城川水注之水出西南石城山東流逕石城

縣故城南地理志右北平有石城縣北屈逕白鹿山

西即白狼山也魏書國志曰遼西單于蹋頓尤強為

袁氏所厚故袁尚歸之數入為害公出盧龍塹山堙

谷五百餘里未至柳城二百里尚與蹋頓將數萬騎

逆戰公登白狼山望柳城卒與虜遇乘其不整縱兵

擊之虜眾大崩斬蹋頓胡漢降者二十萬口英雄記

曰曹操于是擊馬鞞于馬上作十片即于此也博物志曰魏武于馬上逢獅子使格之殺傷甚衆王乃自率常從健兒數百人擊之獅子吼呼奮越案吼近刻作哮左右咸驚王忽見一物從林中出如狸超上王車軛上獅子將至此獸便跳上獅子頭上獅子即伏不敢起于是遂殺之得獅子而還未至洛陽四十里洛中雞狗皆無鳴吠者也案洛中近刻訛作洛陽其水又東北入廣成縣東注白狼水白狼水北逕白狼縣故城東案近刻脫故字王莽更名伏狄白狼水又東方城川水注之水發源

西南山下

案源近刻訛作川

東流北屈逕一故城西

案近刻脫東字

世謂之雀目城東屈逕方城北東入白狼水白狼水

又東北逕昌黎縣故城西地理志曰交黎也東部都

尉治王莽之禽虜也應劭曰今昌黎也高平川水注

之水出西北平川東流逕倭城北蓋倭地人徙之案近

刻訛作蓋委也人從之

又東南逕乳樓城北蓋逕戎鄉邑兼夷

稱也

案近刻訛作之

又東南注白狼水白狼水又東北自魯

水注之水導西北遠山東南注白狼水白狼水又東

北逕龍山西燕慕容皝以柳城之北龍山之南福地

也使陽裕築龍城改柳城為龍城縣十二年黑龍白龍見于龍山鮑親觀龍去二百步祭以太牢二龍交首嬉翔解角而去鮑悅大赦號新宮曰和龍宮立龍翔祠于山上白狼水又北逕黃龍城東十三州志曰遼東屬國都尉治昌遼道有黃龍亭者也案遼近刻訛作黎魏營州刺史治魏土地記曰黃龍城西南有白狼河東北流附城東北下即是也又東北濫真水出西北塞外東南歷重山東南入白狼水白狼水又東北出東流分為二水案近刻脫分字右水疑即渝水也地理志曰

渝水首受白狼水西南循山逕一故城西世以為河

連城案近刻循訛作巡脫西字世字疑是臨渝縣之故城王莽曰馮

德者矣案近刻馮訛作憑渝水南流東屈與一水會世名之

曰檣倫水蓋戎方之變名耳疑即地理志所謂侯水

北入渝者也十三州志曰侯水南入渝地理志蓋言

自北而南也案蓋言近刻訛作言蓋又西南流注于渝渝水又

東南逕一故城東俗曰女羅城又南逕營丘城西營

丘在齊而名之于遼燕之間者蓋燕齊遼迴僑分所

在其水東南入海地理志曰渝水自塞外南入海案近

刻脫外字一水東北出塞為白狼水又東南流至房縣注

于遼魏土地記曰白狼水下入遼也

又東過安市縣西南入于海

十三州志曰案近刻脫曰字大遼水自塞外案近刻脫外字西南至

安市入于海

又立菟高句麗縣有遼山小遼水所出

縣故高句麗胡之國也案胡近刻訛作相漢武帝元封二年

平右渠置立菟郡于此王莽之下句麗水出遼山西

南流逕遼陽縣與大梁水會水出北塞外西南流至

遼陽入小遼水案近刻訛作西南流逕至遼水故地理志曰大梁水

西南至遼陽入遼郡國志曰縣故屬遼東後入立菟

其水西南流故謂之為梁水也小遼水又西南逕襄

平縣為淡淵晉永嘉三年涸小遼水又逕遼隊縣案近

刻訛作逕襄平縣入大遼水案遼近刻訛作梁司馬宣王之平遼東

也斬公孫淵于斯水之上者也

西南至遼隊縣入于大遼水也案此十二字近刻在前接小遼水所出下係後

改人移

涓水出樂浪鏤方縣東南過臨涓縣東入于海案近刻過下衍

字于

許慎云沮水出鏤方東入海一曰出沮水縣十三州

志曰沮水縣在樂浪東北鏤方縣在郡東蓋出其縣

南逕鏤方也

案南近刻訛作而又此句之下原本空一字朱謀埠引謝耳伯云宋本原缺十

二昔燕人衛滿自沮水西至朝鮮

案西近刻訛作而

朝鮮故

箕子國也箕子教民以義田織信厚約以八法而下

知禁遂成禮俗戰國時滿乃王之都王險城地方數

千里至其孫右渠漢武帝元封二年遣樓船將軍楊

僕左將軍荀彘討右渠破渠于沮水遂滅之若沮水

東流無渡沮之理其地今高句麗之國治余訪蕃使

言城在沮水之陽其水西流逕故樂浪朝鮮縣卽樂

浪郡治漢武帝置而西北流故地理志曰沮水西至

增地縣入海又漢興以朝鮮爲遠循遼東故塞至沮

水爲界考之今古于事差謬蓋經誤證也

水經注卷十四

水經注卷十五

後魏酈道元撰

洛水 伊水 瀍水 澗水

洛水出京兆上洛縣謹舉山

地理志曰洛出冢嶺山山海經曰出上洛西山又曰

謹舉之山洛水出焉東與丹水合水出西北竹山東

南流注于洛洛水又東尸水注之案此八字原本及近刻並訛作經尸

近刻訛作水北發尸山案發上近刻衍出字南流入洛洛水又

東得乳水案此七字原本及近刻並訛作經水北出良餘山南流注

于洛

案流近刻
訛作南

洛水又東會于龍餘之水

案此十字
原本及近

刻並訛
作經

水出蠱尾之山

案蠱近刻
訛作蟲

東流入洛洛水又

東

案近刻脫
一洛字

至陽虛山合玄扈之水山海經曰洛水

東北流注于玄扈之水

案近刻脫
此十五字

是也又曰自鹿蹠

之山以至玄扈之山凡九山玄扈亦山名也而通與

謹舉為九山之次焉故山海經曰此二山者洛間也

是知玄扈之水出于玄扈之山蓋山水兼受其目矣

其水逕于陽虛之下山海經又曰

案又字近刻
訛在日字下

陽虛

之山臨于玄扈之水是為洛汭也河圖玉版曰倉頡

為帝南巡登陽虛之山臨于玄扈洛汭之水靈龜負

書丹甲青文以授之即于此水也洛水又東歷清池

山

案此句之下
近刻有傍字

東合武里水水南出武里山東北流

注于洛洛水又東門水出焉

案此八字原本及
近刻並訛作經

爾雅

所謂洛別為波也洛水又東要水入焉水南出三要

山東北逕拒陽城西而東北流入于洛洛水又東與

獲水合水南出獲輿山

案輿近刻訛
作輿下同

俗謂之備水也

東北逕獲輿川世名之為卻川東北流注于洛洛水

又東逕熊耳山北禹貢所謂導洛自熊耳

案此十八
字原本截

上十五字訛作經下三字仍屬注文近
刻截上九字訛作經下九字仍屬注文
博物志曰洛
出熊耳蓋開其源者是也

東北過盧氏縣南

洛水逕鳴渠關北
案此七字原本及近刻並訛
作經又近刻鳴作陽下同
鳴渠

水南出鳴渠山
案南出近刻
訛作出南
即荀渠山也其水一源

兩分川流半解一水西北流屈而東北入于洛山海

經曰熊耳之山浮豪之水出焉西北流注于洛疑即

是水也荀渠蓋熊耳之殊稱若太行之歸山也故地

說曰熊耳之山地門也洛水出其間是亦總名矣其

一水東北逕鳴渠城西故關城也其水東北流注于

洛洛水又東逕盧氏縣故城南
案此十一字原本
及近刻並訛作經
竹

書紀年晉出公十九年晉韓龍取盧氏城
案龍今竹
書紀年作

龐又近刻脫
取盧二字
王莽之昌富也有盧氏川水注之水北

出盧氏山東南流逕盧氏城東東南流注于洛
案近
刻脫

一東字南
訛作而
洛水又東翼合三川
案翼上近
刻衍龍字
竝出縣之

南山東北注洛開山圖曰盧氏山宜五穀可避水災

亦通謂之石城山山在宜陽山西南千名之山咸處

其內陵阜原隰
案近刻
訛作險
易以度身者也又有葛蔓谷

水自南山流注洛水洛水又東逕高門城南即宋書所謂後軍外兵龐季明入盧氏進達高門木城者也

洛水東與高門水合案此八字原本及近刻並訛作經水出北山東

南流合洛水枝津水上承洛水東北流逕石勒城北

又東逕高門城北東入高門水亂流南注洛洛水又

東松陽溪水注之案陽近刻訛作楊下同又此十字原本及近刻並訛作經水出

松陽山北流注于洛洛水又東逕黃亭南又東合黃

亭溪水案亭近刻作城水出鵝鵠山山有二峰峻極于天高

崖雲舉亢石無階援徒喪其捷巧鼯族謝其輕工及

其長霄冒嶺層霞冠峰方乃就辨優劣耳故有大小

鵝鵠之名矣溪水東南流歷亭下謂之黃亭溪水又

東南入于洛水洛水又東得荀公溪口案溪近刻訛作漢水

出南山荀公澗案近刻脫公字即龐季明所入荀公谷者也

其水歷谷東北流注于洛水洛水又東逕檀山南其

山四絕孤峙山上有塢聚俗謂之檀山塢義熙中劉

公西入長安舟師所屆次于洛陽命參軍戴延之案

近刻訛作將與府舍人虞道元即舟逆流窮覽洛川欲知

水軍可至之處延之屆此而返竟不達其源也洛水

又東庫谷水注之

案此九字原本及近刻並訛作經

水自宜陽山南

三川竝發合為一溪東北流注于洛洛水又東得鵠

鵠水口水北發鵠鵠澗

案北發近刻訛作發北

東南流入于洛

洛水又逕僕谷亭北左合北水水出北山東南流注

于洛洛水又東侯谷水出南山北流入于洛洛水又

東逕龍驤城北龍驤將軍王鎮惡從劉公西入長安

陸行所由

案行近刻訛作徑

故城得其名洛水又東左合宜

陽北山水水自北溪南流注洛洛水又東廣由澗水

注之水出南山由溪北流逕龍驤城東而北流入于

洛洛水又東右得直谷水水出南山北逕屯城西北
流注于洛水也

又東北過蠡城邑之南

城西有塢水

案近刻脫有字

出北四里山上原高二十五丈

故龜池縣治南對金門塢水南五里舊宜陽縣治也

洛水右會金門溪水水南出金門山北逕金門塢西

北流入于洛洛水又東合款水其水

案此二字近刻作一有字

源竝發兩川逕引謂之大款水也合而東南入于洛

洛水又東黍良谷水入焉

案良近刻訛作良

水南出金門山

開山圖曰山多重固在韓案山下近刻建武二年强弩

大將軍陳俊案大近刻訛作偏轉擊金門白馬皆破之即此

也而東北流注于洛洛水又東左合北溪南流入于

洛也

又東過陽市邑南又東北過于父邑之南

太陰谷水南出太陰溪北流注于洛洛水又東合白

馬溪水水出宜陽山澗有大石厥狀似馬故溪澗以

物色受名也溪水東北流注于洛案東下近刻洛水又

東有昌澗水注之水出西北宜陽山而東南流逕宜

陽故郡南舊陽市邑也故洛陽都典農治此後改爲

郡其水又南注于洛洛水又東逕一合塢南城在川

北原上高二十丈南北東三箱天險峭絕惟築西面

即爲固案固上近刻一合之名起于是矣劉曜之將攻

河南也晉將軍魏該奔于此故于父邑也洛水又東

合杜陽澗水案陽近刻訛作楊下同水出西北杜陽溪東南逕

一合塢東與槃谷水合亂流東南入洛洛水又東渠

谷水出宜陽縣南女几山案此十五字原本及近刻

仍屬注東北流逕雲中塢左上迢遰層峻案左近刻流

煙半垂纓帶山阜故塢受其名渠谷水又東北入洛

水案近刻脫渠谷二字臧榮緒晉書稱孫登嘗經宜陽山作炭

人見之與語登不應作炭者覺其精神非常咸共傳說太祖聞之使阮籍往觀與語亦不應籍因大嘯登笑曰復作向聲又爲嘯求與俱出登不肯籍因別去登上峰行且嘯如簫韶笙簧之音聲振山谷籍怪而問作炭人作炭人曰故是向人聲籍更求之不知所止推問久之乃知姓名余按孫綽之敘高士傳言在蘇門山又別作登傳孫盛魏春秋亦言在蘇門山又

不列姓名阮嗣宗感之著大人先生論言吾不知其人既神遊自得_{不與物交}阮氏尚不能動其英操復不識何人而能得其姓名

又東北過宜陽縣南

洛水之北有熊耳山雙巒競舉狀同熊耳此自別山不與禹貢導洛自熊耳同也昔漢光武破赤眉樊崇積甲仗與熊耳平卽是山也山際有池池水東南流水側有一池世謂之澠池矣又東南逕宜陽縣故城西謂之西度水又東南流入于洛洛水又東逕宜陽

縣故城南

案此十一字原本及近刻並訛作經

秦武王以甘茂為左丞

用曰寡人欲通三川窺周室死不朽矣茂請約魏以

攻韓斬首六萬遂拔宜陽城故韓地也後乃縣之漢

哀帝封息夫躬為侯國城之西門赤眉樊崇與盆子

及大將等奉璽綬劔璧處世祖不即見明日陳兵于

洛水見盆子等謂盆子丞相徐宣曰不悔乎宣曰不

悔上歎曰卿庸中皦皦鐵中錚錚也洛水又東與厭

染之水合

案染近刻訛作梁

水出縣北傅山大陂山無草木

其水自陂北流屈而東南注世謂之五延水又東南

流逕宜陽縣故城東東南流注于洛洛水又東南黃

中澗水出北阜二源奇發總成一川東流注于洛洛

水又東祿泉水注之

案近刻脫水字

其水北出近溪

案近刻訛作近

出北

洛水又東共水入焉水北出長石之山山無草

木其西有谷焉厥名共谷共水出焉南流得尹溪口

水出西北尹谷東南注之共水又西南與左澗水會

案共水又西南與近刻訛作其水右與西南

水東出近川西流注于共水

共水又南與李谷水合水出西北李溪東南注蓁水

蓁水發源蓁谷西南流與李谷水合而西南流入共

水共水世謂之石頭泉

案近刻脫之字

而南流注于洛洛水

又東黑澗水南出陸渾西山歷于黑澗西北入洛洛

水又東臨亭川水注之水出西北近溪東南與長澗

水會

案與下近刻衍湖字

水出北山南入臨亭水又東南歷九

曲西而南入洛水也

又東北出散關南

洛水東逕九曲南其地十里有坂九曲穆天子傳所

謂天子西征升于九阿此是也洛水又東與豪水會

水出新安縣密山南流歷九曲東而南流入于洛洛

水之側有石墨山山石盡黑可以書疏故以石墨名

山矣洛水又東枝瀆左出焉

案此九字原本及近刻竝訛作經

東出

關絕惠水又逕清女冢南冢在北山上耆舊傳云斯

女清貞秀占跡表來今矣枝瀆又東

案枝近刻訛作故下同

逕

周山上有周靈王冢皇覽曰周靈王葬于河南城西

南周山上蓋以王生而神故諡曰靈其冢人祠之不

絕又東北逕柏亭南皇覽曰周山在柏亭西北

案北近刻

訛作柏

謂斯亭也又東北逕三王陵東北出

案此下近刻衍焉字

三王或言周景王悼王定王也魏司徒公崔浩注西

征賦云定當為敬子朝作難西周政弱人荒悼敬二王與景王俱葬于此故世以三王名陵帝王世紀曰景王葬于翟泉今洛陽太倉中大家冢是也而復傳言在此所未詳矣又悼敬二王稽諸史傳復無葬處今陵東有石碑錄赧王以上世王名號考之碑記周墓明矣枝瀆東北歷制鄉逕河南縣王城西歷邲鄔陌杜預釋地曰縣西有邲鄔陌謂此也枝瀆又北入穀蓋經始周啓瀆久廢不脩矣洛水自枝瀆又東出關惠水右注之世謂之八關水戴延之西征記謂之八

關澤卽經所謂散關鄣自南山橫洛水北屬于河皆

關塞也卽楊僕家僮所築矣惠水出白石山之陽東

南流與瞻水合水東出婁涿之山而南流入惠水惠

水又東南謝水北出瞻諸之山東南流又有交觸之

水北出廐山南流俱合惠水惠水又南流逕關城北

案城北近刻二十里者也案此有脫誤其城西阻塞垣東

枕惠水案枕近刻靈帝中平元年以河南尹何進為

大將軍率五營士屯都亭案近刻置函谷廣城伊闕

大谷轅轅旋門小平津孟津等八關案函谷下近刻

作關復脫小字都尉官治此函谷為之首在八關之限故世

人總其統目有八關之名矣其水又南流入于洛水

山海經曰白石之山惠水出其陽而南流注于洛謂

是水也洛水又與虢水會水出扶豬之山案扶豬近刻訛作林

楮北流注于洛水之南案之近刻作其則鹿蹠之山也世謂

之非山案此下近刻衍也字其山陰則峻絕百仞陽則原阜隆

平甘水發于東麓北流注于洛水也

又東北過河南縣南

周書稱周公將致政乃作大邑成周于中土南繫于

洛水北因于邾山以為天下之大湊孝經援神契曰

八方之廣周洛為中謂之洛邑竹書紀年晉定公二

十年洛絕于周魏襄王九年洛入成周山水大出南

有甘洛城郡國志所謂甘城也案志下近刻衍日字地記曰洛

水東北過五零陪尾北與澗瀾合是二水東入千金

渠故瀆存焉

又東過洛陽縣南伊水從西來注之

洛陽周公所營洛邑也故洛誥曰我卜瀾水東亦惟

洛食其城方七百二十丈南繫于洛水北因于邾山

以為天下之溱方六百里因西八百里案近刻脫此三字為

千里春秋昭公三十二年案近刻訛作二十三年晉合諸侯大

夫成成周之城故亦曰成周也司馬遷自序云案近刻脫

司馬二字太史公留滯周南摯仲治曰古之周南今之洛

陽漢高祖始欲都之感婁敬之言不日而駕行矣屬

光武中興宸居洛邑逮于魏晉咸兩宅焉故魏略曰

漢火行忌水故去其水而加佳魏為土德土水之牡

也水得土而流土得水而柔除佳加水長沙耆舊傳

云祝良字召卿案召近刻訛作石為洛陽令歲時亢旱天子

祈雨不得良乃曝身階庭告誠引罪自晨至中案近刻作

午紫雲水起案近刻作杏起甘雨登降人為歌曰天久不雨

烝人失所天王自出祝令特苦精符感應滂沱下雨

則縣司及河南尹治司隸周官也漢武帝使領徒隸

董督京畿後因名司州焉案近刻脫後字地記曰洛水東入

于中提山間東流會于伊是也昔黃帝之時天大霧

三日帝遊洛水之上見大魚殺五牲以醮之天乃甚

雨七日七夜魚流始得圖書今河圖視萌篇是也昔

王子晉好吹鳳笙招延道士與浮丘同遊伊洛之浦

案與字近刻
訛在道字上

舍始又受玉雞之瑞于此水亦洛神宓

妃之所在也洛水又東合水南出半石之山北逕合

水塢而東北流注于公路澗但世俗音譌號之曰光

祿澗非也上有袁術固四周絕澗迢遞百仞廣四五

里有一水淵而不流故溪澗即其名也合水北與劉

水合水出半石東山西北流逕劉聚

案逕近刻
訛作于三面

臨澗在緱氏西南周畿內劉子國故謂之劉澗其水

西北流注于合水合水又北流注于洛水也

又東過偃師縣南

洛水東逕計素渚中朝時百國貢計所頓故渚得其

名又直偃師故縣南

案直近刻
訛作東

與緱氏分水又東休

水自南注之其水導源少室山西流逕穴山南而北

與少室山水合水出少室北溪西南流注休水休水

又左會南溪水水發大穴南山北流入休水休水又

西南北屈潛流地下其故瀆北屈出峽謂之大穴口

北歷覆釜堆東蓋以物象受名矣又東屈零星塢水

流潛通重源又發側緱氏原開山圖謂之緱氏山也

亦云仙者升焉言王子晉控鶴斯阜

案鶴近
刻作鶴

靈王望

而不得近舉手謝而去其家得遺屍俗亦謂之為撫

父堆堆上有子晉祠或言在九山非此世代已遠案此

下近刻莫能辨之劉向列仙傳云世有簫管之聲焉

休水又逕延壽城南緱氏縣治故滑費春秋滑國所

都也王莽更名中亭即緱氏城也城有仙人祠謂之

仙人觀休水又西轉北屈逕其城西水之西南有司

空密陵元侯鄭袤廟碑案元近刻訛文缺不可復識

又有晉城門校尉昌原恭侯鄭仲林碑晉泰始六年

立案泰近刻休水又北流注于洛水洛水又東逕百

谷塢北戴延之西征記曰塢在川南因高為塢高十

餘丈劉武王西入長安舟師所保也案保近刻洛水

又北陽渠水注之案此九字原本及竹書紀年晉襄

公六年洛絕于洵即此處也洛水又北逕偃師城東

東北歷鄆中水南謂之南鄆案此下近刻有中水亦

曰上鄆也逕訾城西司馬彪所謂訾聚也而鄆水注

之水出北山鄆溪其水南流世謂之溫泉水水側有

僵人穴案僵近刻穴中有僵尸戴延之從劉武王西

征記曰有此尸尸今猶在夫物無不化之理魄無不

征記曰有此尸尸今猶在夫物無不化之理魄無不

征記曰有此尸尸今猶在夫物無不化之理魄無不

征記曰有此尸尸今猶在夫物無不化之理魄無不

征記曰有此尸尸今猶在夫物無不化之理魄無不

遷之道

案魄近刻作魂

而此尸無神識事同木偶之狀喻其

推移未若正形之速遷矣鄴水又東南于訾城西北

東入洛水故京相璠曰今鞏洛渡北有鄴谷水東入

洛謂之下鄴故有上鄴下鄴之名亦謂之北鄴于是

有南鄴北鄴之稱矣又有鄴城蓋周大夫鄴肸之舊

邑

案肸近刻訛作盼下同

洛水又東逕訾城北又東羅水注之

案此十四字原本及近刻並訛作經

水出方山羅川西北流蒲池水注

之水南出蒲陂

案近刻脫水字訛作出南浦陂

西北流合羅水謂之

長羅川

案近刻訛作長川

亦曰羅中也蓋肸子鄴羅之宿居

故川得其名耳羅水又西北白馬溪水注之水出嵩

山北麓逕白馬塢東而北入羅水西北流白桐澗水

注之

案桐近刻訛作相下同

水出嵩麓桐溪北流逕九山東又

北九山溪水入焉

案山下近刻衍東字

水出百稱山東谷其山

孤峰秀出嵯嶢分立仲長統曰昔密有卜成者

案卜成近

刻訛作十城

身遊九山之上放心不拘之境謂是山也山

際有九山廟廟前有碑云九顯靈府君者太華之元

子陽九列名號曰九山府君也南據嵩岳北帶洛澗

晉元康二年九月太歲在戌

案此有脫誤近刻作太歲庚午考元康二年乃

也王子帝遣殿中中郎將關內侯樊廣綏氏令王與主

簿傅演案近刻脫主簿二字傳訛作傳奉宣詔命興立廟殿焉又有

百蟲將軍顯靈碑碑云將軍姓伊氏諱益字隤數帝

高陽之第二子伯益者也晉元康五年七月七日順

人吳義等建立堂廟永平元年二月二十日刻石立

頌贊示後賢矣其水東北流入白桐澗又北逕袁公

塢東蓋公路始固有此也故有袁公之名矣北流注

于羅水羅水又西北逕袁公塢北又西北逕潘岳父

子墓前有碑岳父此瑯琊太守碑石破落文字缺敗

岳碑題云給事黃門侍郎潘君之碑碑云君遇孫秀

之難闔門受禍故門生感覆醢以增慟乃樹碑以記

事太常潘尼之辭也羅水又于訾城東北入于洛水

也

又東北過鞏縣東又北入于河

洛水又東明樂泉水注之水出南原下三泉竝導故

世謂之五道泉即古明溪泉也春秋昭公二十二年

師次于明溪者也洛水又東逕鞏縣故城南東周所

居也本周之畿內鞏伯國也春秋左傳所謂尹文父

涉于鞏卽于此也洛水又東濁水注之卽古黃水也

案黃近刻水出南原京相璠曰訾城北三里有黃亭

卽此亭也春秋所謂次于黃者也洛水又東北河水

發南溪石泉案河近刻訛世亦名之爲石泉水也京

相璠曰鞏東地名坎飲在河水東疑卽此水也又逕

盤谷塢東世又名之曰盤谷水案盤近刻司馬彪郡

國志鞏有坎飲聚春秋僖公二十四年王出及坎飲

服虔亦以爲鞏東邑名也今考厥文若狀焉而不能

精辨耳晉太康地記晉書地道記竝言在鞏西非也

其水又北入洛洛水又東北流入于河案此九字原

訛作山海經曰洛水成臯西入河是也謂之洛汭卽

什谷也故張儀說秦曰下兵三川塞什谷之口謂此

川也史記音義曰鞏縣有鄴谷水者也黃帝東巡河

過洛脩壇沈璧受龍圖于河龜書于洛赤文綠字案

近刻訛堯帝又脩壇河洛擇良卽沈案近刻脩訛榮

光出河休氣四塞白雲起迴風逝赤文綠色廣袤九

尺負理平上有列星之分七政之度案七近刻帝王

錄記興亡之數以授之堯案近刻又東沈書于日稷

赤光起立龜負書背甲赤文成字遂禪于舜舜又習

堯禮案禮近刻作祀沈書于日稷赤光起立龜負書至于稷

下榮光休至黃龍卷甲舒圖壇畔赤文綠錯以授舜

舜以禪禹殷湯東觀于洛習禮堯壇降璧三沈榮光

不起黃魚雙躍出濟于壇黑鳥以浴隨魚亦上化為

黑玉赤勒之書黑龜赤文之題也湯以伐桀故春秋

說題辭曰河以道坤出天苞洛以流川吐地符王者

沈禮焉竹書紀年曰洛伯用與河伯馮夷鬪蓋洛水

之神也昔夏太康失政為羿所逐其昆弟五人須于

洛汭作五子之歌于是地矣

伊水出南陽魯陽縣西蔓渠山

案近刻脫魯陽二字

山海經曰蔓渠之山伊水出焉淮南子曰伊水出上

魏山地理志曰出熊耳山即麓大同陵巒互別耳伊

水自熊耳東北逕鸞川亭北蕞水出蕞山北流際其

城東而北入伊水世人謂伊水為鸞水蕞水為交水

故名斯川為鸞川也又東為淵潭潭渾若沸亦不測

其深淺也伊水又東北逕東亭城南又屈逕其亭東

東北流者也

東北過郭落山

陽水出陽山陽溪世人謂之太陽谷水亦取名焉東流入伊水伊水又東北鮮水入焉水出鮮山北流注于伊伊水又與蠻水合水出盧氏縣之蠻谷東流入于伊

又東北過陸渾縣南

山海經曰瀟瀟之水出于釐山南流注于伊水今水出陸渾縣之西南王母澗澗北山上有王母祠故世因以名溪東流注于伊水即瀟瀟之水也伊水歷崖

口山峽也巽崖深高壁立若闕崖上有塢伊水逕其下歷峽北流即古三塗山也杜預釋地曰山在縣南

闕駟十三州志云山在東南今是山在陸渾故城東

南八十許里周書武王問太公曰吾將因有夏之居

南望過于三塗北瞻望于有河案近刻脫此二十七字春秋昭

公四年司馬侯曰四嶽三塗陽城太室荆山中南九

州之險也服虔曰三塗大行轅轅崤澗案近刻作崤非南

望也京相璠著春秋土地名案近刻脫土字亦云山名也以

服氏之說案近刻作服氏之言云塗道也準周書南望之文或

言宜為轅轅大谷伊闕

案近刻或訛作服谷訛作道

皆為非也春

秋晉伐陸渾請有事于三塗知是山明矣有七谷水

注之水西出女几山之南七溪山

案几宋本作机近刻訛作桃上

有西王母祠東南流注于伊水又北蚤谷水注之水

出女几山之東谷東逕故亭南東流入于伊水伊水

又東北逕伏流嶺東嶺上有崑崙祠民猶祈焉劉澄

之永初記稱陸渾縣西有伏流坂者也今山在縣南

崖口北三十里許西則非也北與溫泉水合水出新

城縣之狼臯山西南阜下

案狼臯山西近刻作狼臯山之西

西南流

會于伊水伊水又東北逕伏睹嶺左納焦澗水水西

出鹿臯山

案臯近刻訛作臯

東流逕孤山南

案近刻脫逕字

其山介

立豐上單秀孤峙故世謂之方山即劉中書澄之所

謂縣有孤山者也東歷伏睹嶺南東流注于伊伊水

又東北涓水注之水出陸渾西山即陸渾都也

案陸渾下

近刻衍山字都訛作者

尋郭文之故居訪胡昭之遺像世去不

停莫識所在其水有二源俱導而東注號略在陸渾

縣西九十里也司馬彪郡國志曰縣西號略地

案近刻訛

作池春秋所謂東盡號略者也北水東流合侯澗水水

出西北侯溪

案水近刻作澗

東南流注于涓水涓水又東逕

陸渾縣故城北平王東遷辛有適伊川見有被髮而

祭于野者曰不及百年此其戎乎魯僖公二十二年

秦晉遷陸渾之戎于伊川

案秦近刻訛作春

故縣氏之也涓

水東南流左合南水水出西山七谷亦謂之七谷水

阻澗東逝

案阻近刻作祖

歷其縣南又東南左會北水亂流

左合禪渚水

案水近刻訛作渚

水上承陸渾縣東禪渚渚在

原上

案在近刻訛作左

陂方十里佳饒魚葦卽山海經所謂

南望禪渚禹父之所化郭景純注云禪一音暖

案一字近

刻訛在禪字上鯀化羽淵而復在此然已變怪亦無往而不

化矣世謂此澤爲慎望陂陂水南流注于涓水

案近刻訛

作涓陽水下同

涓水又東南注于伊水昔有莘氏女采桑于

伊川得嬰兒于空桑中言其母孕于伊水之濱夢神

告之曰曰水出而東走毋明視而見白水出焉告其

鄰居而走顧望其邑咸爲水矣其母化爲空桑子在

其中矣莘女取而獻之命養于庖長而有賢德

案長而近

刻訛作而長殷以爲尹曰伊尹也

又東北過新城縣南

馬懷橋長水出新城西山東逕晉使持節征南將軍

宗均碑南

案宗近刻訛作宋

均字文平縣人也其碑太始三

年十二月立其水又東流入于伊又有明水出梁縣

西狼臯山

案近刻作狼臯山

俗謂之石澗水也西北流逕楊

亮壘南西北合康水水亦出狼臯山東北流逕范塢

北與明水合

案近刻此下衍北汶二字

又西南流入于伊山海經

曰放臯之山明水出焉南流注于伊水是也伊水又

與大戟水會水出梁縣西有二源北水出廣成澤西

南逕楊志塢北與南水合水源南出廣城澤西流逕

陸渾縣南

案近刻訛作西流陸渾

河南十二縣境簿曰

案近刻脫境字

廣城澤在新城縣界黃臯西北流屈而東逕楊志塢

南

案近刻脫志字

又北屈逕其塢東又逕塢北同注老倒澗

俗謂之老倒澗水西流入于伊伊水又北逕新城東

與吳澗水會水出縣之西山東流南屈逕其縣故城

西又東轉逕其縣南故蠻子國也縣有鄭聚今名蠻

中是也漢惠帝四年置縣其水又東北流注于伊水

伊水又北逕當階城西

案近刻訛作又逕西北當階城西

大狂水入

焉水東出陽城縣之大誓山

案近刻訛作大苦口

山海經曰大

砮之山多璵璠之玉其陽狂水出焉西南流其中多

三足龜人食之者無大疾可以已腫狂水又西逕綸

氏縣故城南竹書紀年曰楚吾得帥師及秦伐鄭圍

綸氏者也左與倚薄山水合水北出倚薄之山南逕

黃城西又南逕綸氏縣故城東案近刻脫縣字而南流注于

狂水狂水又西八風溪水注之水北出八風山南流

逕綸氏縣故城西案近刻脫縣故二字西南流入于狂水狂水

又西得三交水口水有三源案三近刻訛作二各導一溪竝

出山南流合舍案此四字近刻訛作南合流三字故世有三交之名

也石上菖蒲一寸九節為藥最妙服久化僊案近刻脫此十

六其水西南流注于狂水狂水又西逕缶高山北西

南與湮水合水出東北湮谷西南流逕武林亭東北

又屈逕其亭南其水又西南逕湮陽亭東蓋藉水以

名亭也又東南流入于狂狂水又西逕湮陽城南又

西逕當階城南而西流注于伊伊水又北土溝水出

玄望山西案山西近刻訛作西山東逕玄望山南又東逕新城

縣故城北東流注于伊水伊水又北板橋水入焉水

出西山東流入于伊水伊水又北會厭澗水水出西

山東流逕邠垂亭南春秋左傳文公十七年秋周甘
斨敗戎于邠垂者也服虔曰邠垂在高都南杜預釋

地曰河南新城縣北有邠垂亭司馬彪郡國志曰新
城有高都城今亭在城南七里遺基存焉案近刻京

相璠曰舊說言邠垂在高都南今上黨有高都縣余
謂京論疎遠未足以證無如虔說之指密矣案如虔

作知其水又東注于伊水伊水又北逕高都城東徐
廣史記音義曰今河南新城縣有高都城竹書紀年

梁惠成王十七年東周與鄭高都利者也又來儒之

水案儒近出于半石之山西南流逕斌輪城北西歷

艾澗以其水西流案水字近刻又謂之小狂水也其

水又西南逕大石嶺南開山圖所謂大石山也山下

有大石嶺碑河南隱士通明以漢靈帝中平六年八

月戊辰于山堂立碑文字淺鄙殆不可尋魏文帝獵

于此山虎超乘輿孫禮拔劍投虎于是山山在洛陽

南而劉澄之言在洛東北非也山阿有魏明帝高平

陵王隱晉書曰惠帝使校尉陳總仲元詣洛陽山請

雨總盡除小祀惟存大石而祈之七日大雨卽是山

也來儒之水又西南逕赤眉城南又西至高都城東
西入伊水謂之曲水也

又東北過伊闕中

伊水逕前亭西左傳昭公二十二年案近刻訛作三十二年晉

箕遺樂徵右行詭濟師取前城者也案詭近刻訛作跪京相

璠曰今洛陽西南五十里伊闕外前亭矣服虔曰前

讀為泉周地也伊水又北入伊闕昔大禹疏以通水

兩山相對望之若闕伊水歷其間北流故謂之伊闕

矣春秋之闕塞也案近刻作焉昭公二十六年趙鞅使女

寬守闕塞是也陸機云洛有四闕斯其一焉東巖西

嶺竝鐫石開軒高甍架峰西側靈巖下泉流東注入

于伊水傅毅反都賦曰因龍門以暢化開伊闕以達

聰也闕左壁有石銘云黃初四年六月二十四日辛

巳大出水舉高四丈五尺齊此巳下蓋記水之漲減

也案減近刻訛作減右壁又有石銘云案右近刻訛作石元康五年

案元康近刻訛作永康河南府君循大禹之軌部督郵辛曜新

城令王琨部監作掾董猗李褒斬岸開石平通伊闕

石文尚存也

又東北至洛陽縣南北入于洛

伊水自闕東北流枝津右出焉

案近刻枝訛作之

東北引漑

東會合水同注公路澗入于洛今無水戰國策曰東

周欲為田西周不下水蘇子見西周君曰今不下水

所以富東周也民皆種他種欲貧之

案貧近刻訛作食

不如

下水以病之東周必復種稻種稻而復奪之是東周

受命于君矣

案近刻脫命字

西周遂下水即是水之故渠也

伊水又東北枝渠左出焉水積成湖北流注于洛今

無水

案近刻訛作合伊水

伊水又東北至洛陽縣南逕園丘東

大魏郊天之所準漢故事建之後漢書郊祀志曰

案近

刻脫後字

建武二年初制郊兆于洛陽城南七里為園壇

八陛中又為重壇天地位其上皆南向其外壇上為

五帝位其外為壇重營皆紫以像紫宮按禮天子大

裘而冕祭皦天上帝于此今裘冕也壇壇無復紫矣

伊水又東北流注于洛水廣志曰鯢魚聲如小兒號

案近刻脫號字

有四足形如鯢鱧

案近刻脫鯢字

可以治牛出伊水

也司馬遷謂之人魚故其著史記曰始皇帝之葬也

以人魚膏為燭徐廣曰人魚似鮎而四足即鯢魚也

灋水出河南穀城縣北山

縣北有替亭

案替近刻
訛作潛

灋水出其北梓澤中梓澤地

名也澤北對原阜即裴氏墓塋所在碑闕存焉其水

歷澤東南流水西有一原其上平敞古替亭之處也

案替近刻
訛作舊

即潘安仁西征賦所謂越街郵者也

東與千金渠合

周書曰我卜灋水西謂斯水也東南流水西南有帛

仲理墓墓前有碑題云真人帛君之表仲理名護益

州巴郡人晉永寧二年十一月立灋水又東南流注

于穀穀水自千金塢東注謂之千金渠也

又東過洛陽縣南又東過偃師縣又東入于洛

澗水出新安縣南白石山

山海經曰白石之山惠水出于其陽東南注于洛澗

水出于其陰北流注于穀世謂是山曰廣陽山水曰

赤岸水亦曰石子澗地理志曰澗水在新安縣東南

入洛

案近刻在作出
南下衍東字

是為密矣東北流歷函谷東坂

東謂之八特坂

案後穀水注內摯仲治三輔決錄至
我卜澗水東者是也原本及近刻並

訛在此下又其上引山海經之文截取山海
經曰北流注于穀九字重出于此今訂正

東南入于洛

孔安國曰澗水出澗池山今新安縣西北有一水北

出澗池界東南流逕新安縣而東南流入于穀水安

國所言當斯水也然穀水出澗池下合澗水得其通

稱或亦指之為澗水也竝未之詳耳案近刻訛作詳之耳今孝

水東十里有水世謂之慈澗又謂之澗水按山海經

則少水也而非澗水蓋習俗之誤耳又按河南有離

山水謂之為澗水水西北出離山東南流案此下近刻有注于

離山澗水也又東南流共十歷邾山于穀城東而南

一字係上下文訛外致衍

流注于穀舊與穀水亂流案此下近刻衍流同二字南入于洛今

穀水東入千金渠澗水與之俱東入洛矣或以是水

竝為周公之所相卜也呂忱曰今河南死水案穀水注云南

出為死穀北疑其是此水也然意所未詳

故竝書存之耳

水經注

卷五

茅元銘校

水經注卷十五



